

## 2 San Pedro

### *Jacheuayama*

<sup>1</sup> Atše Simón Pedro, Jesucristbe oserverná y chabe ichmoná, quem tsbuanácha sentsabiarná tšëngaftangbiamá, ndëmuanÿenga šmojashjache jtsebomnama canÿe ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nÿetscanga chábeñe chamotsošbuáchema.

<sup>2</sup> Atše sëntseimpadana, tšëngaftanga Bëngbe Bëtsabiamá y Bëngbe Utabná Jesusbiamá cada te más jtsetatsëmbëse, Bëngbe Bëtsá chaoma tšabe bendicionënga tšëngaftangbeñe chaotsemnama y chaoma tšëngaftanga ainaniñe tšabe ebionana chašmotsebomnama.

### *Chë Jesucristbeñe ošbuáchiÿëngbe tšabe soyënga*

<sup>3</sup> Bëngbe Bëtsá chabe obenánaca tojama bënga chamobená jtsebomnama, lempe ntšamo tmojtsëjabotcá tšabe vida jtsebomnama y jtšiyenama, Bëngbe Bëtsá jadórama soyënga jtsamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnama y bëts soyënga jamëse, chabe entšanga chamotsemnama. <sup>4</sup> Chca, Bëngbe Bëtsá šojatšatá ntšamo bënga jatšatayama tojanašebuachenacá, bëts y uámana soyënga, chca, quem luarentša bacna soyënguentsána chašmotsojuánañama. Chë bacna soyënga quem luarentše jtsebínÿnana,

entsanga nÿe cachëngbe bacna juabnëngaca jtsiyenama yapa boše causa. Chánaca chë tšabe soyënga šojatšatá, tšëngaftanga cháftaca cánÿiñe mo canÿacá chašmotsemnana, cachacá jtsemnana jashjáchëse. <sup>5</sup> Chca, ndoñe quenátsmëna nÿe Jesucristbeñe ošbuáchiyana jtsebomnana; chiñe šmochjenobuáshjache, bëtscá tšabe soyënga jtsamëse; chora bëtscá šmochtsama Bëngbe Bëtsabe soyëngama chacmotsësertánama; <sup>6</sup> chora bëtscá šmochtsama cach tšëngaftanga jenomándama chašmotsobenama; y chca, tšëngaftanga masque padecena soyënguiñe chašmojtsachnëjuana, ainaniñe puente añemo jtsebomnëse, puente uantadënga chašmotsemnana; y chentšana bëtscá šmochtsama, tšëngaftanga Bëngbe Bëtsá šmojtsadoránama jinÿanÿiyama; y <sup>7</sup> chca, nÿetsca tšëngaftanga ošbuáchiyënga chašmotsenbobonshana; y chca, nÿetsca entsanga chašmotsababuánÿeshana.

<sup>8</sup> Tšëngaftanga lempe chë soyënga šmojtsebomna, y bëtscá chca šmojtsamëse, šmochantsiyena becá oservena soyënga jtsamëse, y chentšana puente tšabe soyënga echantsóbocana, corente tšabá Bëngbe Utabná Jesucristo chašmotsábuatmama. <sup>9</sup> Pero nda quem soyënga ndoñe tontsama, Bëngbe Bëtsabe soyëngama ndoñe ntosertánana; y chca, cha mo canÿe jtaná o nduabinÿnacá jtsemnana; cha tbojtsebnatjëmbe Bëngbe Bëtsá chabe tempsca bacna soyënga tbojtsebojuánama, y Bëngbe Bëtsabe delante cachiñe tšabá chaotsatsmënama tojamama. <sup>10</sup> Chíyeca, Jesucristbeyeca atšbe catšátanga, nÿa šmochtsentšena chca tšabe soyënga jtsamama, y chca, corente tšabá

šmochanjátatšëmbona, Bëngbe Bëtsá chabe entšanga chašmotsemnana tcmojáchembuama y tcmojábacacama; y chca jtsamëse, Jesucristbeñe ošbuáchiyana ndocna te quešmochatajbaná. <sup>11</sup> Chca, Bëngbe Bëtsá oyejuayá tšëngaftangbiamana echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

<sup>12</sup> Chcáyecna, atše sëntsejuabná tšëngaftangbioye sempre chë soyëngama jtsabuayiynayana, masque chë soyëngama ya šmotátšëmbo, y tša šmojtsošbuaché Bëngbe Bëtsabe ndegombre soyënguiñe y chca šmojtsiyena, chë mora šmojtsetátšëmbo soyënguiñe. <sup>13</sup> Sëntsejuabná, chajjéftsainëntscuana tšabá yojtsemna jamana, ainaniñe bëtscá añemo chašmotsebomnana chë soyënga jtsamama, ntšamo tijayancá jtsabuayiynayëse. <sup>14</sup> Atše sëntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe Utabná Jesucristo šonjéftsanbuayenacá; <sup>15</sup> pero bëtscá chanjéftsema, atše chajjóbana chentšánënaca tšëngaftanga nyets tempo chë soyëngama chašmotsenójuabnana.

*Cristo corente uamaná y obená yojamnana tmojáninýe ora*

<sup>16</sup> Bëngbe Utabnabe obenanama y cha yochjésabama ntšamo tchbonjanabuatambacá, ndoñe quenjatsmëna entšangbe osertanánaca pormana cuentëngaca, er cach bënga botamana fsënjáninýe chabe uámanana y obenana. <sup>17</sup> Bëngbe Bëtsá chë Taitá, Jesucristo puerte obenana bomná bëtsemnana y cha corente bëtscá y uamaná

bétsemnama tonjaninÿinÿé ora, bēnga fsēnjáninÿe. Chca fsēnjáninÿe Bēngbe Bētsá, chē puerte uámana y bētsábiocana oyebuambnayana Jesúsbioye mēntšá tbonjaniyana ora: “Mua atšbe bonshana Uaquiñá endmēna, atše chabiamana sēntsoyejuá ca.”

<sup>18</sup> Cach bēnga chē oyebuambnayana fsēnjanuena, chē celocana tonjanóbocnana, er bēnga Bēngbe Utabnáftaca fsēnjanmēna, chē uámana tjoca.

<sup>19</sup> Chē sóyeca bēnga fsēntsobena corente jtsetatšēmbuana, ntšamo chē Bēngbe Bētsabe juabna oyebuambnayēnga tmojanayancá ndegombre bétsemnama, y tšēngaftanga tšabá šmochántsama, ntšamo chēnga tmojanayancá šmojtseyeunanēse. Chca, chēngbe palabrēngaca entsopodena Bēngbe Bētsabe soyēngama tšēngaftanga jinÿanÿiyana, y echántsemna mo canÿe uajuinÿanēsha canÿe ibetiñe luarentše tojtsebinÿnacá. Chē soyēnga šmochtsuenana Jesucristo yochjésabēntscuana; chora, cha nÿetsca soyēnga cmochanjínÿanÿiye, mo tšēngaftangbiamana canÿe tsēm te cuafjabinÿncá, y chē jabínÿnama ora bínÿnaye estrella tojábocna tšēngaftanga jabuabinÿnamcá. <sup>20</sup> Pero natsana chacmēsertá, ndocna palabra Bēngbe Bētsabe uabemana palabrēnguiñe tojayana canÿe soye yochjopása ca, cabá chca ndopása ora, nÿe cach Bēngbe Bētsabe juabna oyebuambnayēngbe juabnentsana tojanóbocnama; <sup>21</sup> er Bēngbe Bētsabe juabna oyebuambnayēnga ndoñe monjanoyebuambná nÿe chēnga chca jamama imnabóšeyeca, ndayá Bēngbe Bētsabe cuenta tmojanoyebuambá, chē Uámana Espíritu chēnga chca chamóyebuambama

tojánmayeca.

## 2

### *Chë ndoñe ndegombre soyënga buátëmbayënga (Jud 4-13)*

<sup>1</sup> Chë Bëngbe Bëtsabe juabna oyebuambnayëngbe tempo, Israeloca entšángbeñe baseftángnaca imojamna, ndëmuanýënga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe abuátambayënga mochántsemna, y chënga ndoñe ndegombre soyënga mochántsabuatambaye, pero ndegombre soyëngaca cánýiñe, chca, chënga chca imojtsabuátambama entšanga ndoñe chamondétatšëmbonama. Chë buátëmbana soyënga echanjama, entšanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsabuatambaye soyëngaca, mochántsama Jesucristo ndoñe chëngbe Utabná chaondëtsemnama, cha nda chënga tojatsebacá, mo nda ínýënga játsebacama crocénana cuafjëtšajocá. Y chca, nýe ndeolpe, chë Bëngbe Bëtsábíocana uabouana castigo nýetsca tescama mochántsebomna.

<sup>2</sup> Banga chëngbioye mochantsésetona, nýetscna bacna soye, jenomándama ntšobencá jtšamëse; y chëngbe causa, ínýënga ndoñe tšabá quemochátoyebuambnaye chë tšabe benachama, chë ndegombre soyëngaca benache jtšishachama.

<sup>3</sup> Chënga bëtscá crocénana jtšebomnama yapa mochántseboše causa, ba

bostero soyëngaca cmochántsaingñaye; pero Bëngbe Bëtsá tempo chëngbiana tojánayana, ndoñe tšabá imojtsamama y chëngbiana castigo nyetsca tescama chaotsemnámna.

<sup>4</sup> Bëngbe Bëtsá chë bacna soyënga tmojanma angelëngbioye ndoñe tonjanaperdoná, ndayá infernoye tojtsanatsatše y puerte ibetiñe tojtsanabáshejuana, chë uabouana tbocha chamoquedama, Bëngbe Bëtsá chëngbiana nyetsca tescama castigo chamotsebomnama yochjayana orscama. <sup>5</sup> Y cach ndoñe quem luarentša entsángbioye tonjanaperdoná Noé yojëftsiyena ora, y chënga jácastigama aíñe tojanma chë uabouana uaftena chëngbeñe chaotsemnama, chë nduauenana y bacna entsanga jtsapochócama. Chentšana, nje Noébioye, tbojanatsbocá, nda entsanga yojanabuayiyná ntšamo jtsiyenana, Bëngbe Bëtsabe bominyiñe tšabá yomncá jtsamëse; cha y inye canyséftangnaca tojanatsebacá.

<sup>6</sup> Bayté entsemna, Bëngbe Bëtsánaca tojánayana chë Sodoma y Gomorra bëts pueblentša entsanga, yapa bacna entsanga imojamnama, bëts castigo jtsebomnama yojánamnama; y iñesheca tojtsanapochocá, chë pueblënga y chentša entsanga jatinýá jtsabiamëntscuana. Y chë sóyeca Bëngbe Bëtsá tojaninýanjé ntšamo bacna entsángaftaca yochjama, chë chentšana mochtsiyena bacna entsangbiana. <sup>7</sup> Pero Bëngbe Bëtsá Lótbioye tbojanatsbocá, chë bëts pueblënga pochócayentsana. Cha yojamna Bëngbe Bëtsabe bominyiñe tšabá amá, y ntšamo chë luarentša entsanga imojaniyenama, nyetscna bacna soye jtsamëse, jenomándama ntšobencá, cha puerte

ngménana inabomna. <sup>8</sup> Er quem tšabe entšá, chěngbeñe oyená, chě entšanga imojtsama bacna soyěnga cada te yojanonŷaye y yojanuenana ora, puerte chabe tšabe ainaniñe inasufrina.

<sup>9</sup> Chca, Běngbe Utabná endobena chě Běngbe Bětsábioye adórayěnga játsebacana padecena soyěnguentšana y bacna soyěnga jamama juabněnguentšana, y chě bacna soyěnga jamama uamaněngna castigáněnga jtsabamnama, chě ntšamo chěnga imojaniyeněntscuana imojanamcá ndoñe tšabá yonjamna ca Běngbe Bětsá yochjayana tescama, y chěnga nyetsca tescama chě běts castigo chamotsebomnama jamándama. <sup>10</sup> Chca ndegombre endmēna, y más chě ndēmuanŷenga nŷe cachěngbe cuerpěngama bacna juabněngaca jtsaměse imoyeněngbiana, chěnga chě Běngbe Utabnabe mando jtsaboténana. Chěnga bacá buátsenaněnga mondmēna y jtsebošana nŷe ntšamo cachěnga tmojtsejuabnacá chaotsemnama, y ndoñe ntsauatjana chě espíritěnga obenana bomněngbiana puerte bacna soyěnga jtsóyebuambnayama. <sup>11</sup> Chamna chě angelěnga, masque más añemo y obenana bomněnga mondmēna, ndoñe jenñémuana chě espíritěnga obenana bomněngbiana chca jayanama, chěngbiana ndoñe tšabe soyěnga jtsóyebuambnayěse, Běngbe Utabnabe delante.

<sup>12</sup> Pero chě buátěmbayěnga, chě cachěnga ndoñe tontsěsertana soyěngama puerte bacá jtsóyebuambnayana, y chca, chěnga mondmēna mo tja bayěngcá, soyěnga tšabá josértama juabna ndbomněnga; chěnga jtsiyenana nŷe

ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye. <sup>13</sup> Chënga mochanjasúfria, ínÿyënga chamosufrima tmojama causa. Chëngbe oyejuayana endmëna nÿe chora chënga tšabá jtsemnana soyënga. Tšëngaftangaftaca cánÿiñe mo ošbuachiyëngcá tmojttesá ora, tšëngaftangbiam a ouatjca jtsemnana y chëngbe causa, ínÿyënga tšëngaftangbiam a podesca mochántsicamo, er chënga chentše oyejuayënga jtsemnana, nÿe chënga tšabá jtsemnama jtsamëse; y chënga tšëngaftangbeñe jtsemnana, tšëngaftangbioye jtsaíngñase.

<sup>14</sup> Chënga ndoñe ntsoobenana canÿe shembása jinÿyana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿe batšá ošbuáchiyana bomnënga jtsaíngñayana, y siempre jtsentšénana nÿe más soyënga jésebošama y jésebomnama, ínÿyënga tmobomnama más soyënga jashjáchama; chënga montsemna pochocánënga jtsemnama. <sup>15</sup> Chënga chë tšabe benachentšana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtscá crocénana juacánama ínÿyëngbiam a bacna soyënga jtsamëse; <sup>16</sup> y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y chca, ndoñe



tbonjanlesenciá jama chë ndocna juábnaca soye jamama.

<sup>17</sup> Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntoservénana, y chca, chënga jtsemnana mo búyeshe obocanentše tojtsebuashjá; y chënga mora canye soye jtsejuabnayana y chentšana inyetsá; chca chënga jtsemnana mo jantšetëshënga bëts bínýiaca bonjnëshëngcá. Chëngbiamá Bëngbe Bëtsá tojayana castigo chamotsebomnama, chë más ibetoca, tondaye binýniñe luarentše. <sup>18</sup> Chënga ba botamana palabrëngaca jtsenábotamnayana, pero tondayama ntoservénana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtsábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyënjanase, nýe cachënga tšabá jtsomñama bacna juabnéngaca soyënga chamotsamama, cachënga jenomándama ntobencá. <sup>19</sup> Chë abuátambayënga jašebuachenana tšabe vida jónýenama, nýe ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnéngaca mandánënga, y chca, chënga montsajna pochocánënga jtsemnana, er ndaye entšánaca mandaná jtsemnana, chë nyets tempo tobedecena sóyeca. <sup>20</sup> Er ndëmuanýënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nýe quem luarama enójuabnaye entšangcá, nyetsca bacna

soye amana y tša bacna juabnënga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnëngaca, chënga mora más bacá tempscama jabocanana. <sup>21</sup> Chëngbiamá más tšabá manjamna ndoñe ntjobenayana jtsetatšëmbuana ntšamo Bëngbe Bëtsabe bominyiñe tšabá yomncá inétsamama, chë soye jatabuátmanana y chentšana játajbanana chë buatëmbana soyënga y chë abuyayinayëngaftaca chëngbioye Bëngbe Bëtsá tojanoyé mandënga jtsojedecénana. <sup>22</sup> Pero chëngaftaca tojopasá ntšamo entšanga mondëntšayancá chca ndegombre bëtsemnama: “Chë queše chabe ashconánana tojtsemnoye jeshhëconana ca” y “chë cotše cabá chora bebená, ngüichetšoye jana jetsójanduouoyama ca”.

### 3

#### *Jesucristo quem luaroye jésabama ora*

<sup>1</sup> Jesucristbeyeca atšbe bonshana catsátanga, móraca ya uta soyama cbontsëbuabiamná. Quem uta tsbuanáchaca atše sënjábošena jamama tšëngaftangbe juabna nÿe ena tšabe soyëngaca chaotsemnama, y chca chaotsemnamna atše jtsabuayinayëse chë tcmojanabuatambá soyëngama. <sup>2</sup> Atše sëntseboše tšëngaftanga chašmotsenojuabná, ntšamo chë inÿe tempënga ora, chë nÿe Bëngbe Bëtsábioye jtsošervënëse, chabe juabna oyebuambnayënga tmojánayanama, y chë Bëngbe Utabná y Atsebacayabe buatëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

<sup>3</sup> Pero masna quem soye chacmotsésertana: Jesucristo quem luaroye jésabama tempo chaojtsobeco ora, mochántsemna entsanga y chënga mochantsiyena nÿe cachënga tšabá jtsomñama bacna juabnëngaca, y cmochantsëbuayajuana, chë Cristo yochjésabama šmošbuáchema. <sup>4</sup> Chënga mëntsá mochántsihamo: “Cristo tmojanašebuachená quem luaroye jésabama. ¿Ndegombre chca? Chcase, ¿ndayentše cha yojtsemna? Bëngbe bëtsësanga, ndëmuanÿengbioye cha tojanašebuachená quem luaroye jésabama, ya tmonjóbana, y quem luarentše lempe cachcá endesomñe, ntšamo quem luare tojanobojatšé orscana enjamncá ca.” <sup>5</sup> Chë entsanga ndoñe ntsebošana jtsejuabnayana ya bayté yojtsemna, Bëngbe Bëtsá tojanmandá y chca tojanma celoca y quem luare chaotsemnama. Cha quem luare tojanma búyeshentšana y búyesheca; <sup>6</sup> y cach búyeshecnaca, chë uabouana uaftenentša béjayeca, ya bayté yojtsemna, cha lempe quem luarentše yojanbinÿncá tojtsanpochocá. <sup>7</sup> Pero chë mora entsemna celoca y quem luare, cach Bëngbe Bëtsabe mándoca, ndoñe quenátopodena chamotsepochochocama, chë Bëngbe Bëtsá jayanama chábioye ndoñe mondadoránënga ntšamo tmojamcá ndoñe tšabá yonjamnama, y chë bacna soyënga tmojamama nÿetsca tescama castigo chamotsebomnama jamándama tempo candóshjanguëntscuana. Chora Bëngbe Bëtsá, celoca y quem luare íñeshca echantsepochochá.

<sup>8</sup> Pero, atšbe bonshánënga, canÿe soye endmëna y chë soye ndoñe chacmondébnëtjomba:

Bëngbe Utabnabe juabnama, canye te endmëna mo canye uaranga uatcá, y canye uaranga uata mo canye tecá. <sup>9</sup> Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betsko yochanjama ca, chë cha quem luaroye jésabama, ndayá chana puerte uantado tsëngaftangaftaca comna; er cha jtsebošana ndocná nyetsca tescama castigo chaondëtsebomnama, ndayá nyetscanga bacna soyënga amana jtsajbanase, Bëngbe Bëtsabe tsabe benache chamuashjáchama.

<sup>10</sup> Pero Bëngbe Utabná echanjésabo ndocná chama chaondëtsejuabná ora, mo canye atbëbanacá jashjanguana, ndocná chama tontsejuabná ora. Chora celoca echanjopochóca, canye jabuache shauenanáncá, y quem luare ndaye soyënguentšana yomnana íñesheca echántsefjatëjo, y ndayá Bëngbe Bëtsá y entsanga quem luarentše tmojamcá, lempe echántsejuinýe.

<sup>11</sup> Lempe chca japochócama entsémnayeca, ndegombre tsëngaftanga cmontsamna jtsiyenana ntšamo chë Bëngbe Bëtsabe entsanga jtsiyenana entsamncá, y nyets tempo jtsamëse chë Bëngbe Bëtsábioye jtsatschuanayama yomna soyënga, <sup>12</sup> tsëngaftanga chë Jesucristo quem luaroye jésabama chaóshjanguama šmojtsobátmanëntscuana; y nýa šmochtsentšena cha más betsko cháuesabama. Chë te íñesheca celoca echántsejuinýe, y ndaye soyënguentšana quem luare yomnana cach íñesheca echántsefjatëjo. <sup>13</sup> Pero bënga mondobátmana ntšamo cha šojašebuachenacá: canye tsëm luare, mo canye tsëm celoca y tsëm

fshantscá, y chentše nyetscanga mochantsiyena ntšamo Bëngbe Bëtsabe bominyiñe tšabá yomncá jtsamëse.

14 Chíyeca, atšbe bonshánënga, chë soyënga chaotsemnana šmojtsobátmanëntscuana, nÿa chiñe šmochtsentšena, chca, cha yochjésabo ora, chacmanÿena oyeniñe tšabá Bëngbe Bëtsáftaca jtsatsmënëse, ínÿengaftaca natjëmbana jtsiyenëse; chacmanÿena ainaniñe ndocna bacna soye ndbomnënga, y puerte tšabá jtsamëse oyeniñe; chca, ndocná chaondobená jayanama tšëngaftanga ndaye bacna soye šmojama ca. 15 Quem soye šmochtsejuabnaye: Bëngbe Atsebacayá ndoñe yapa betscó tonjésabësna, chca jtsemnana cha puerte uantado nyetscángaftaca yómnayeca; chca cha yomna, ba entšanga chë bacna soyënga amana chámajbanama y chabe benache chámuatishachama y chca, atsebácanënga chamotsemnana. Cach quem soyëngámnaca, Jesucrístbeyeca bëngbe bonshana catsata Pablo tcmónjanëbuábiamá, chë Bëngbe Bëtsá tojanma cha chaotsebomnana osertanáca. 16 Chë soyëngama, Pablo nyetsca chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínÿënga, y chë mora canÿe soye jtsejuabnayana y chentšana inÿetšá juabnayënga, jtsejuabnayana y ínÿengbioye jtsabuayiynayana ndoñe ndegombre yondmëna ca. Y cachcá jtsamana inÿe soyëngaca, Bëngbe Bëtsabe uabemana palabreñguiñe. Chca chënga montsajna pochocánënga jtsemnana.

<sup>17</sup> Chíyeca, atšbe bonshánënga, tšëngaftanga chë ya šmojtsetátšëmbo chë ndoñe ndegombre soyënga abuátambayënga mochtsemnama, yejuana šmochtsantješna; chca, chë Bëngbe Bëtsá ntšamo yomandacá ndobedecenëngbe soyëngaca ínÿënga jáingñama, tšëngaftanga ndoñe chašmondëtsemna mo uambanëngcá, ndoñe chašmondëtsajbanama jtsebomnana chë Bëngbe Bëtsabe soyënga ntšamo šmojashjachcá. <sup>18</sup> Pero atšna, Bëngbe Utabná y Atsebacayá Jesucristo sëntseimpadana, tšëngaftanga chašmotsiyena jtsamëse, chë chábentsana šmojóyëngacñe ba soyënga ntšamo tomnama jtsejuabnayëse, y chaoma tšëngaftanga cada te más tšabá cha chašmotsábuatmama. ¡Nÿetscanga cha chamotsatschuaná, mora y nÿetsca tescama! Chca chaotsemna.

## **Bëngbe Bëtsa Cabëngaftaca Entsoyebuambna New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
19104c0e-9046-5ff3-82fb-eb838c88dcf9